

E LUS DI MUNDU

Bos di Profesia -- Lès 2



FOR DI UNDA NOS A HAÑA NOS BEIBEL?

Versikulo di Memoria: "Tur e Skritura ta duná pa medio di inspirashon di Dios" (2 Timoteo 3:16).

Den nos último lès, nos a studia tokante e origen di hende. Kada akto mester tin un aktor, kada trabou ta rekení un trahadó. Tur kos ku ta, mester tabata trahá. Nos ta yama e Trahadó di tur kos, e Kreador di tera, matanan, animalnan, hende, etc., "DIOS". Nos Trahadó a duna nos un buki di guia-- un buki di direkshon-- e Beibel. E buki aki lo ta e base di tur estudio den e lèsnan aki.

E SKRITURA SANTU

1. Ken a skirbi e Beibel?

"Komprondé esaki promé, ku no ta di su mes hende ta splika profesia di Skritura. Pasobra promé aya profesia no a wórdu duná pa boluntad di hende, ma HOMBERNAN SANTU di Dios a papia, inspirá pa SPIRITU SANTU". (2 Pedro 1:20, 21).

Tin sesenta i seis (66) buki den nos Beibel, skirbí pa medio di hopi outor. E hòmbenan aki tabata biba den diferente paisnan, sentenares di añanan apart; tog tur loke kada unu a skirbi ta kuadra ku otro. Nan tabata skirbi loke nan a wórdu dirigi pa skirbi dor di e Spiritu Santu. Den tempu di Hesus no tabatin Tèstament Nobo, ta p'esei semper E tabata lesa i bisa vèrsnan for di e Tèstament Bieu.

2. Kiko Hesus a bisa tokante e Skrituranan?

"Boso ta ristra e Skrituranan, pasobra den nan boso ta kere di tin BIDA ETERNO, i nan ta duna TESTIMONIO DI MI" (Juan 5:39).

*Asina tá ku e Beibel ta nos quía
pa bida eterno. Ta p'esei nos mester
tin asina tantu interés den
studiamentu di Dios Su Palabra.
Asina'ki nos por siña kon nos ta
haña bida eterno huntu ku Hesus.*

3. Nos por konfia den Dios Su Palabra skirbí?

"Santifiká nan den Bo bèrdat: Bo Palabra ta e bèrdat" (Juan 17:17).

Hesus a bisa masha kla, "Bo Palabra ta bèrdat". Ora bo

lesa e Beibel, bo por kere kada palabra ku e ta bisa.

4. Ken a duna nos e Skrituranan i pa ki propósito? `Tur e Skritura ta duná pa inspirashon di Dios, i ta útil pa siñansa, pa reprendementu, pa mehoramentu, pa eduká hende den hustisia; dimanera ku e hende ku ta sirbi Dios, por ta kualifká i bon prepará pa hasi tur sorto di bon obra" (2 Timoteo 3:16, 17).

Dios Su buki lo muestra nos e manera perfekto di biba. E Beibel ta duna nos un pótrèt kompleto di bida. Si nos kita parti di e Palabra di Dios, e pótrèt lo dañá.

5. Kí desafío Dios ta hasi na esnan ku ta bisa ku nan tin poder divino?

"Mustra nos e kosnan ku a pasa antes den tempu bieu, korda ku-Ami ta Dios, no tin otro:" Ami ta Dios i no tin mi pareu. Fo'i kuminsamentu ya Mi ta anunsiá e fin. Mi ta predesí hopi delantá kosnan ku-no a pasa ainda. T'Ami t'Esun ku ta bisa: `Mi desishon ta irevokabel; Mi boluntad ta lei"(Isaiás 46:9, 10).

Dios ta puntra si tin hende ku por rei loke ta bin sosodé den e tempunan ku ta bini, ku por bisa tempu dilantá loke ta bini, óf si tin algun otro siñansanan religioso, fuera di Beibel, ku por splika e kosnan di tempu antiguo. Nò! Fuera di Beibel, ta konfushon so tin tur kaminda. Solamente e Beibel ta bisa nos: (a) Ken a traha mundu; (b) Di unda hende a bini; (c) Pakiko nos ta akinan; (d) Na unda nos ta bai.

Solamente e Beibel ta pinta e pótrèt kompleto di futuro di hende, ta p'esei Dios ta invitá... "Mira na Mi, i wórdu salbá, tur e finnan di tera, pasobra Ami ta Dios, i no tin mas". (Isaiás 45:22). Unikamente e Beibel ta dirigi nos na un Salvador.

6. Pa preservá e registro di Dios Su plan, kiko El a pidi e profetanan di Beibel hasi?

"I Dios a bisa na Moises: `Pone e palabranan aki riba papel, pa ningun no lubidá i ripiti'é den oreanan di Hosue" (Eksodo 17:14).

E profetanan di Dios den tempunan antiguo tabata skirbi segun e Spiritu Santu tabata dirigi nan. Nan tabata instruí pa skirbi i pa konservá e Skrituranan inspirá, ku tabata di importansha pa tur tempu. Tabata

e plan di Dios ku e mensahenan aki por wordu skirbE den un buki. (Numbernan 33:2; Hosue 21:25, etc).

7. Kiko e otro skirbidoman di Beibel tabata instruí pa hasi pa evitá kibokashon?



Daniël, Moses, Paul

"I Hosue a skirbi e palabranan aki den e buki di e lei di Dios' (Hosue 24:26). 1 Samuel a skirbi den un buki, i a ward'é dilanti Señor" (1 Samuel 10:25). "Tuma un ròl di pèrkament i skirbi den dje tur kos ku Mi a yega di bisa bo tokante Israel, Huda i e otro pueblonan" (Jeremias 36:2)

Dios tabatin un propósito definí pa manda e pèrsonanan aki skirbi nan registranan, kosnan di tempu presente di Tempu ku a pasa, i tambe profesianan di loke ta bai sosòde.

8. Ki prueba nos tin ku e profetanan a rekosé skurbimentu di e otronan komo inspirá? "Ami Daniel a komprondé bon den e bukinan, e kantidat di añanan di kua Señor a papia na e profeta Jeremias" (Daniël 9:2).

Esakí ta mustrandu Daniel studiando e otro bukinan inspirá di e profetanan Isaias, Jeremias, Ezekiel, algun di nan tabata kisas konosí di dje. Tambe den Testament Nobo, San Pedro a bisa: *"Meskos tambe den tur su kartanan, (Pablo) a papia ku boso dje kosnan aki; den kuanan tin algun kos difisil pa komprondé, kual esnan ku ta bobo i inkonstante ta duna un otro splikashon di nan, meskos ku nan ta hasi ku otro skrituranan pa nan mes pèrdishon" (2 Pedro 3:16).*

Aki e apòstel Pedro ta referí na e kartanan inspirá di Apòstel Pablo komo "skrituranan". Den su dianan mes e kartanan di Pablo tabata wòrdu aseptá pa e iglesianan komo inspirá di Dios. Hopi ta kere ku tabata e profeta Esdras ku a pone huntu e bukinan di Testament Bieu (ku tabata skirbí realmente pa 30-diferente profetanan) den un tomo inspirá. Den e añanan 150 promé ku Hesu-Kristu tur e Testament Bieu tabata wòrdu aseptá komo un tomo inspirá i tabata tradusí den e lenga Griego.

9. Kiko Hesus mes a bisa tokante importansha di e Skrituranan di Testament Bieu?

"Ma E (Hesus) a bisa: Si nan no ta tende ni di Moises i ni dje profetanan, asta si un hende lanta for di morto esei tampoko lo no kombensé nan" (Lukas 16:31).

Aki Hesus ta deklará ku e Skrituranan di Moises i di e otro profetanan ta e evidensianan mas grandi di bèrdat ku por wòrdu hañá. E Skrituranan den e Testament Nobo ta kontené 263 konekshon dirèkt ku e Testament Bieu, asina ku nos sabi ku e skirbidónan di Testament Nobo ta kere den e profetanan di antes. E Testament Nobo ta kontené e historia di bida di Hesus, e historia di e promé iglesia, e profesianan tokante e futuro di e Iglesia. Segun bo ta sigui studia, lo bo mira ku e Beibel ta enbèrdat un karta di Dios pa bisa bo tokante Su Yu, i Su plan pa salba bo.

E PROFESIANAN TA PRUEBA DI E INSPIRASHON DI BEIBEL

No ta difisil pa proba ku e Beibel ta skirbí pa Dios so, ku konosé e futuro, no pa hende. Hopi bes Dios a bisa e profetanan pa skirbi e kosnan ku tabata bin sosodé...asina ku ora e kosnan sosodé hende por kere ku tabata Dios ku a papia na nan di antemano. Laga nos studia tokante algun dje historianan milagroso di kumplimentu di profesia.

10. Kiko Dios a deklará profeta Ezekiel ku lo sosodé ku e stat di Tiro, un di e statnan mas grandi di mundu den e dianan ei?

"I nan lo destruí e murayanan di Tiro, i tumba su torennan. tambe lo mi raspa su stòf for di dje i hasi'é manera un baranka bashi. Lo e bira un lugá pa habri reda riba dje meimei di laman, pasobra Ami a papia, Señor Dios a bisa...i lo Mi hasi bo manera e Kabes di un seru, lo bo ta un lugá pa habri reda riba dje. Lo bo no wòrdu konstruí mas; pasobra ami e Señor a papia esei, Señor a bisa". (Ezekiel 26:4, 5, 14).

Ora esaki a wòrdu papiá pa medio dje humilde profeta di Dios, tabata parse manera ku nunca esaki por a sosodé ku e stat grandi i riku na e banda nôrt di Palestina, ku ta keda kantu di e playanan di e laman Mediteráneo. Tiro algun bes ta wòrdu yamá e "New York" di e termpu ei. Tòg e profesia tokante di dje a kumpli eksaktamente. Promé, Nabuko-donosor, e rei di Babilonia a destruí e stat di Tiro. Ma Tiro mester a spera 250 aña pa e resto dje profesia wòrdu kumplí. E pueblo dje pais a edifiká un stat nobo riba un isla poko retirá den e laman i a yamá e "Tiro". Den aña 332 promé ku Hesu-Kristu, Alejandro e Grandi a bini pa ataká e Tiro nobo aki riba e isla.

Pasobra e no tabatin barku di guera pa bringa kontra e stat dje isla, Alejandro e Grandi a manda su hòmbèrnan pa rekehé tur e ruinan di e Tiro bieu, i tira nan den laman, i asina traha un kaminda pa bai riba e isla; nan a raspa tur e greis for di e Tiro bieu. Asina e profesia a wòrdu kumplí. Tiro lo wòrdu raspá i bashá den laman. I versíkulo 14 (ariba) ta bisa ku Tiro nunca mas lo wòrdu edifiká. Nunca lo e wòrdu edifiká mas, pasobra Beibel semper ta papia bèrdat.

I asina anto hopi añanan padilanti promé ku el a tuma lugá e profeta a deklará di antemano eksaktamente kon

un stat grandi lo wòrdu destruí pa semper.

11. Kiko e profetanan a bisa ku lo bin sosodé ku e gran stat Babilonia, riku, balente, i orguyoso?"

"I Babilonia, e gloria di reinonan, e bunitesa dje kaldeonan, lo ta manera ora Dios a destruí Sodoma i Gomora. Nunka mas lo e wòrdu habitá, ni lo biba den dje ningun generashon. Ni e Arabiman lo pone nan tent ei Ni e wardadónan lo traha nan kurá ei E bestianan furioso lo drumi aya; i e palabruanan lo drumi ei" (Isaias 13:19, 20, 21).

"I Babilonia lo bira montonnan, sin ni un habitante. Asina e Señor di ehersitonan a bisa; e muraya hanchu di Babilonia lo ser enteramente kibrá i su portanan haltu lo wòrdu kimá ku kandela" (Jeremias 51:37, 58).

E habitantenan di Babilonia a pensa ku Babilonia lo no kai nunka, su murayanan grandi di piedra tabata mas di 300 pia haltu i 60 pia diki. E stat tabata un fòrti poderoso, tòg e humilde profetanan a skirbi e mensahenan ku Dios a dikta pa nan, i kada palabra a sali bèrdat, asina ku

ningun hende ku kompará e Beibel ku historia por duda ku e profesianan di Beibel ta bèrdat.

12. Mas ku shen aña promé ku Siro a nase, kiko Señor a bisa ku lo e hasi?"

"Asina Señor a bisa na Su unglí, na Siro, esun ku mi a tuma na su man drechi, -pa suheta nashonnan dilanti di dje; pa habri dilanti dje e dos blat di portanan; i e portanan lo no wòrdu será: Lo mi bai dilanti bo i hasi e lugá korkubá net: Ami lo kibra na pida e portanan di koper, i kòrta e baranan di heru tira un banda. (Isaias 45:1, 2).

"Esun ku ta bisa na e fondo di laman: Bira bash!, lo mi seka bo riunan" (Isaias 44:27).

Aki tin un cuadro profétiko di e manera ku Siro, e rei dje Medo i Persianan, mester a ataká e stat di Babilonia. I awor laga nos ban repasá loke a sosoclé:

- a. El a bira e riu Eufratès (ku tabata kore pasa na e muraya pafó krusa bai den e stat di Babilonia), el a kòrta e riu di su kurso, i seka e kama dje roi bieu, asina ku e por a marcha su hòmbènan pasa dor di e roi seku, pasa bou dje murayanan grandi di e stat, i drenta den e stat pa konkisté.
- b. E anochi ei e rei di Babilonia, Belsasar, i su prinsipal hòmbènan di su gobièrnu, tur tabata burachi, e hòmbènan di guardia tambe tabata burachi. Nan a lubidá di sera e portanan dje muraya parti paden, i Siro a marcha drenta ku su hòmbènan i a tuma e suidat.
- c. El a kòrta e portanan di koper, i a karga e oro i plata dje stat bai kuné.

I kòrda tambe ku Dios a manda Isaias skirbi tur e kosnan aki mas di 100 aña promé ku Siro a nase, asta El a yama Siro na su nòmber. Sigur ta, ku ningun hende por duda e sabiduria di kere Dios Su palabra.

DIOS SU PALABRA TA NOS UNIKO GUIA SIGUR

13. Den e tempunan solèm aki, segun nos ta mira e futuro, di kiko nos lo ta sigur?

"Pasobra Señor Dios lo no hasi nada sin revelá Su sekretu na Su sirbideman, e profetanan" (Amos 3:7).

Ta un konsuelo maravioso pa hende por realisá ku Dios sabi loke ta biniendo, i El a deklará di antemano e -eventonan aki den e profesianan di Beibel.

14. Pakiko e eventonan di tempunan pasá, i Dios Su cuadro di e tempunan ku ta bini, ta asina kuidadosamente skirbr den Beibel?

"Ma tur e kosnan aki a sosodé ku nan, komo ehèmpel i nan ta skirbí!) komo un spièrtamentu pa nos, ku lo mira e kabamentu di mundu" (1 Korintionan 10:11).

Nos mester ta gradisidu pa e Beibel, pasobra e ta splika e tempu pasá, i ta yuda nos pa komprondé e tempu presente, i ta duna nos ayudo, konseho (spièrtamentu), speransa i konsuelo pa e tempu ku ta bini.


15. Kiko nos tin awe ku ta mas duru ku ehèrsitonan mas skèrpi ku spadanan?

"Pasobra e Palabra di Dios ta bibu i poderoso, i mas skerpi ku kualke spada ku ta kòrta tur dos banda. E ta penetrá te na e divishon di alma i spiritu, i di skarnir i tuti, i ta kapas pa huzga e pensamentunanqhonnan di kurason" (Hebreonan 4:12).

Pa 2000aña hende a ataká e Beibel. Nan a trata di kambié, i destruré, ma te ainda e ta pará pasobra Dios a protehá Su Palabra for di su enemigunan.

Kada persona mester tin un Beibel

Di su mes i e mester siña haña e referensianan di Beibel. E ta e salbanguardia mas grandi di un hende. E -ta kòrta afó tur piká for- di den kurason i bida. Bo por konfia e Beibel semper, lo e yuda bo, i por último lo e trese salbashon na tur ku ta sigui'é.



PREGUNTANAN PA REPASO DI LES 2

1. Bo a siña e versíkulo di memoria? Si _____ Nó _____
2. Di akuerdo ku 2 Pedro 1:21 e Beibel tabata skirbí dor di _____
segun nan tabata wórdu guiá pa medio di e _____ (Par. 1).
3. Den e siguiente remarkenan ta marka un sirkulo rónt di bèrdat, si e kontesta ta bon, óf falsu, si e kontesta ta malu.
Bèrdat Falsu E skirbidónan di Tèstament Nobo nunca a papia di e Tèstament Bieu.
Bèrdat Falsu Trinta hómbler a skirbi e bukinan di Tèstament Bieu.
Bèrdat Falsu Nan a skirbi nan vishon pasobra Dios a bisa nan pa hasi esei.
4. Pakiko Hesus no a lesa for di e Tèstament Nobo? (Par. 1) _____
5. Pablo a skirbi den 2 Timoteo 3:16 " _____ Skritura ta duná pa _____ di Dios, i ta útil pa _____
_____, pa _____, pa _____
6. Isaias ta bisa nos ku Dios só por anunsiá e _____ for di _____ (Par. 5).
7. Skirbi nómber di tres skirbidó di Beibel ku Dios a manda pa skirbi e mensahenan: _____
_____ i _____ (Par. 6, 8).
8. Kiko profeta Ezekiel a bisa lo sosodé ku Tiro? _____
_____ (Par. 10).
9. Bisa a lo menos tres (3) kos ku a sosodé ku Babilonia: (Par. 11, 12) a. _____
b. _____ c. _____
10. E hómbler ku tabata yamá na su nómber, mas di 100 aria promé ku el a nase, ta _____
i el a destrui e stat di _____ (Par. 12).
11. Dios a primintí ku E lo revelá tur e eventonan k ta bin pasa na Su sirbidónan, e _____
12. E _____ ta mas fuerte ku ningun kos den e mundu aki; e ta mas skèrpi ku
un _____ i ta siña e kaminda pa _____ etèrno, i _____
_____ pa tur ku sigui'é. (Par. 14, 15).

MI NOMBER I DIREKSHON:

Nómber : _____ (Fam) _____

Kaya _____ Number: _____ Stad: _____

Debolbé e papel aki na: P.O. Box # 300 òf Landhuis Gaito òf Scalaweg 7 --Curaçao N.A.